

25. — *La Vieille.*

En peine ay vescu longuement,  
Tant que n'ay plus de vivre envie;  
Mais bien je croy certainement  
Meilleure la Mort que la vie.

26. — *Le Médecin.*

Tu congnoys bien la maladie  
Pour le patient secouru,  
Et si ne scais, teste estourdie,  
Le mal dont tu debvras mourir.

27. — *L'Astrologue.*

Tu dis par amphibologie  
Ce qu'aux aultres doibt advenir;  
Dy moy donc par astrologie  
Quand tu debvras à moy venir?

28. — *L'Avare.*

Ceste nuict la Mort te prendra,  
Et demain seras enchassé :  
Mais dy moy, fol, à qui viendra  
Le bien que tu as amassé ?

29. — *Le Trafiquant.*

Vain est cil qui amassera  
Grandz biens et tresors pour mentir :  
La Mort l'en fera repentir,  
Car en ses lacz surpris sera.

30. — *Les Navigateurs.*

Pour acquerir des biens mondains  
Vous entrez en tentation,  
Qui vous met es perilz soubdains  
Et vous maine à perdition.